

Transkription von Urkunde QBD 1443a

Ort, Datierung: Quedlinburg, 1443-05-26

Signatur: Stadtarchiv Quedlinburg, Abt. I, 16

Inhalt: Bischof Burchard von Halberstadt: Nutzungsrechte für die Stadt Quedlinburg

We Borchard van godesgnaden Bÿschop to halberstad Bekennen vor vns vnde al vnse nakomelinge in dussem open breue vnde / vor alle den de one sehen horen oder lesen . So also den vorsichtigen vnsem leuen besunder(e)n Borgermeister(e)n Radmannen borger(e)n / vnde der gantzen gemeÿne beÿder Stede Quedelingborch van vnsem vorscre(ue)n Bÿschoppe Albrechte gekoren van Brünswigk / vnde dem godeshuse to halberstad vorsegilt vnde vordreuet is to gebrukene water vnde weÿde eyne halue mile weghe / v(m)me Quedelingborch to ewigen tiden also dat des gn(an)ten vnser vorfaren breue dar ouer gegeuen utwisen vnde inholden / So hebben we an gesehen oren nod vnde schaden vnde one v(m)me ores deinstes vnde sunderliker gunst vnde gnade willen / de we to one hebben erlouet vnde de macht gegeuen mit witschop vnde vulbort vnser Capittels des dohmes to halberstad / dat se in der gn(an)ten weÿde mogen buwen vnd(e) maken vÿsche dyeke nemliken In der sulten to lutken Czallersleue In der / hackel vÿsche vnde In dem sole vnder dem langenberge In den vleden Jegen der kerken to Marsleue(n) So dat se der schullen / vnde mogen gebruchen ewichliken an vnse vnser nakomelinge vnser Capittels insage ane geuerde . Vnde we Conrad / deken vnde gantze Capittel des dohmes to halberstad Bekennen in dussem suluen breue dat de opgn(an)te vnse gnedige here mit / vnsem guden willen witschop vnd(e) vulbord den vorgn(an)ten Borg(er)meistren Radman(n)en borgeren vnde der gantzen gemeÿne beÿder / Stede Quedelingborch dat erlouet vnde sodan(n)e macht gegeuen heft dar ane schullen we noch vnse nakomelinge vnde / willen se nicht hinderen noch hinderen laten to ewigen tiden ane geuerde . Dat alle dusse vor vnd(e) nagescreuene stücke vnd(e) / artikele dusses breues den opgn(an)ten Borg(er)meister(e)n Radman(n)en borger(e)n vnde der gantzen gemeÿne beÿder Stede to Quedelingborch / ewichliken stede gantz vnd(e) vnuorbroken gehalten werde So hebben we opgn(an)te Borchard Bÿschop vnse Ingesegil vnde / we Conrad deken vnd(e) Capittel des dohmes to halberstad vnser Capittels grote Ingesegil vor vns vnde vnse nakomelinge / laten hengen neddene an dussen breff Na (cristi) gebord vnser leuen heren veirteynhundert Jar dar na in dem drey vnd(e) / veirtigste(n) Jare Am Sondage also me(n) singet in der hilligen kerken vocem

Jocunditatis